



ADMINISTRACIÓN LOCAL

PROVINCIAL

DEPUTACIÓN PROVINCIAL DA CORUÑA

Servizo de Acción Social, Cultural e Deportes. Sección de Educación e Cultura

Aprobación bases reguladoras PREM-RD/2025

Mediante resolución de Presidencia aprobáronse as Bases do XXII - Premio “Rafael Dieste” de Textos Teatrais, cuxo texto se transcribe:

XXII - Premio “Rafael Dieste” de Textos Teatrais

BASES

Primeira.- Obxecto

Coa intención de incentivar a creación literaria en lingua galega no campo teatral, que constitúe unha das expresións artísticas con maior incidencia social, e en lembranza do xenial escritor e dramaturgo rianxeiro, a Deputación Provincial da Coruña convoca con carácter bienal o XXII Premio “Rafael Dieste” de Textos Teatrais

Segunda.- Persoas destinatarias

Poderán participar todas aquelas persoas maiores de idade, que non obtivesen o premio nos cinco anos anteriores a este, e que presenten obras inéditas e non premiadas con anterioridade en ningún outro premio ou certame.

A orixinalidade da obra e a súa autoría xustificarase mediante unha declaración responsable na que se manifeste ser a persoa autora e titular de todos os dereitos.

En consecuencia, a Deputación Provincial da Coruña non se fará responsable das posibles denuncias por plaxio ou eventualidade similar que poidan xurdir, polo que recaerá na persoa participante afectada as accións legais que procedan e asumirá, se é o caso, as indemnizacións que poidan corresponder polos prexuízos ocasionados a particulares ou á organización.

As persoas participantes terán a obriga de comunicar á Deputación a concesión de calquera premio que obteña a obra presentada, no momento en que esta situación se produza, o que dará lugar á súa exclusión do premio.

Terceira.- Dotación

Establécese un premio único dotado con 6.500€, que poderá quedar deserto ou ser concedido con carácter ex aequo; neste caso, o seu importe repartirase proporcionalmente entre as persoas que resulten premiadas.

Esta cantidade está suxeita ás retencións legais que lle sexan aplicables.

O premio non poderá concederse a título póstumo, sen prexuízo dos dereitos de sucesión que poidan exercerse si a persoa premiada falecese despois do fallo do xurado.

Cuarta.- Prazo

O prazo de presentación de solicitudes iníciase o día **10 de febreiro de 2025 e rematará ás 14:00 horas do día 10 de abril de 2025**, logo da publicación do extracto da convocatoria deste premio no BOP da Coruña, a través da Base de Datos Nacional de Subvencións.

Quinta.- Envío da obra e documentación

Para garantir o anonimato das solicitudes, a presentación realizarase baixo o sistema de PLICA coa presentación dun sobre pechado, a portes pagados, que indique no exterior o título do **XXII Premio “Rafael Dieste” de Textos Teatrais**, ao seguinte enderezo:

Deputación provincial da Coruña
Avenida Porto da Coruña 2
15003 A Coruña

Dentro deste sobre principal incluíranse dous sobres (sobre A para a obra e sobre B para a documentación). Ambos sobres indicarán o seguinte no exterior:

- XXII Premio “Rafael Dieste” de Textos Teatrais
- Título da obra
- Un lema ou pseudónimo

Sobre A – Obra

- Incorporará a obra proposta, preferentemente en formato dixital: USB/CD.
- O tratamento de texto será Word, LibreOffice ou PDF, en formato DIN A4 e as páxinas deberán estar numeradas.
- As obras estarán escritas en lingua galega e serán de tema e extensión libres.
- En ningún caso o nome da persoa autora poderá aparecer no texto da obra.
- No caso de optar pola presentación en papel, os orixinais serán enviados por duplicado, en exemplares separados, e impresos polas dúas caras, grampados ou encadernados.

Sobre B - Documentación

Incorporará os seguintes documentos:

- Copia do documento de identidade
- Datos de contacto: enderezo, teléfono de contacto, correo electrónico
- Breve currículo
- Documento co seguinte contido:
 - Declaración responsable de que a persoa autora é titular de todos os dereitos e que a obra é inédita e que non foi premiada, até a data de presentación, en ningún outro certame ou premio.
 - Cesión temporal dos dereitos de edición da obra (título da obra) por un prazo de dezaioito meses, que se contarán dende a data da concesión do premio.

Sexta.- Xurado

O xurado estará presidido pola Deputada de Cultura, quen actuará con voz e sen voto, e formarán parte del cinco persoas de recoñecido prestixio no ámbito teatral e literario galego nomeadas por ela.

As funcións de secretaría exerceraas a Secretaría da Corporación ou a persoa funcionaria en quen delegue.

Para o nomeamento do xurado respectarase a presenza equilibrada de mulleres e homes, en cumprimento do disposto no artigo 70 da Lei 7/2023, do 30 de novembro, para a igualdade efectiva de mulleres e homes de Galicia.

As persoas que integren o xurado estarán sometidas ao deber de abstención nos casos sinalados no artigo 23 da Lei 40/2015, de 1 de outubro, de réxime xurídico do sector público.

A composición dos xurados daranse a coñecer, con anterioridade á súa reunión, no taboleiro de anuncios da sede electrónica co fin de que se poidan interpor, se é o caso, os recursos legais pertinentes.

Aplicarase o disposto na Lei 40/2015, do 1 de outubro, de réxime xurídico do sector público (LRXSP), Título preliminar, Capítulo II, Sección 3ª: Órganos colexiados das distintas administracións públicas”, artigos 15 a 18, no que se refire tanto á validez da súa constitución, como á actuación do xurado.

As deliberacións serán secretas e delas serán estendidas as actas correspondentes.

Sétima.- Concesión e pago

Concesión

A reunión do xurado terá lugar no segundo semestre de 2025 e a resolución de concesión do premio será dada a coñecer a través do Boletín Oficial da Provincia; a Deputación resérvase o dereito a cambiar a data se é necesario.

O xurado poderá declarar deserto o premio ou ser concedido con carácter ex aequo.

Se hai finalista, a plica correspondente á obra poderá ser aberta pola persoa que exerza a secretaría do xurado co fin de que, se a persoa autora o permite, poida darse a coñecer o seu nome.

A proposta de concesión que formule o xurado será obxecto da resolución da Presidencia, que resolverá a súa aprobación, previo informe do Servizo de Acción Social, Cultural e Deportes e do Servizo de Fiscalización.

Non se devolverán as obras presentadas non premiadas e a partir do día seguinte ao da decisión do xurado serán destruídas.

Pago

Para o cobro do premio, a persoa premiada deberá presentar a seguinte documentación:

Residencia española:

- Certificacións das administracións tributarias correspondentes e da Tesourería da Seguridade Social nas que se acredite que a persoa está ao corrente nas súas obrigas tributarias e coa Seguridade Social. Poderá omitirse a presentación desta documentación sempre que envíe un documento autorizando expresamente á Deputación provincial da Coruña ás consultas tributarias e non se opoña á consulta de datos da Seguridade Social.
- Comunicación de alta de datos bancarios para o rexistro de terceiros, que figura no apartado de impresos oficiais da páxina web da Deputación provincial da Coruña.
- Certificación da titularidade de conta, expedida pola entidade bancaria.

Outra residencia:

- Copia do pasaporte ou DNI
- Certificado de residencia fiscal
- Declaración de non ter establecemento permanente en España
- Certificación de titularidade de conta bancaria

A presentación desta documentación farase preferentemente por medios electrónicos a través do modelo “solicitud xeral” dispoñible na sede electrónica da Deputación da Coruña.

A sede electrónica admite os certificados electrónicos do sistema CI@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNIe).

Tamén poderá presentala en calquera dos lugares e rexistros establecidos na normativa reguladora do procedemento administrativo común.

A concesión e pago do premio será publicado na Base de Datos Nacional de Subvencións (BDNS).

Oitava.- Obrigas

A Deputación publicará a obra premiada, reservándose durante un prazo de dezoito meses, contados dende a data da concesión do premio, os dereitos de edición. Ademais entregará á persoa premiada trinta exemplares da obra editada.

A Deputación, de acordo coa persoa premiada, poderá decidir financiar a posta en escena da obra por parte dunha compañía teatral galega, cunha achega máxima de 70.000€, sen que isto supoña compensación complementaria ningunha para a persoa autora.

Novena.- Protección de datos

Os datos facilitados serán tratados pola Deputación da Coruña coa finalidade de tramitar esta convocatoria.

A participación nesta convocatoria implica aceptar a realización de fotografías e/ou vídeos pola Deputación da Coruña no certame de entrega dos premios ou no desenvolvemento das actividades complementarias.

As ditas imaxes poderán ser publicadas en:

- A páxina web e perfís en redes sociais da Deputación.
- Filmacións destinadas á promoción da actividade.
- Publicacións para dar a coñecer a actividade.

A lexitimación para o tratamento dos datos persoais baséase no cumprimento dunha misión de interese público.

Os datos poderán ser comunicados ás Administracións públicas para o exercicio das súas competencias e serán conservados de acordo co establecido na normativa de arquivo.

As persoas interesadas poden exercer os dereitos de acceso, rectificación, supresión, oposición, limitación ao tratamento e portabilidade dos datos a través da sede electrónica da Deputación da Coruña ou presencialmente nos lugares e rexistros establecidos na normativa reguladora do procedemento administrativo común. Así mesmo se considera que o tratamento incumpre co establecido no RXPd pode reclamar perante a AEPD.

Poden consultar máis información relacionada coa protección de datos na nosa Política de Privacidade ou dirixindo un correo a delegadodeprotecciondedatos@dacoruna.gal.

Décima.- Aceptación das bases

A participación nesta convocatoria supón a total aceptación destas bases.

A Coruña, 30 de xaneiro de 2025

O Presidente

Valentín González Formoso

A Secretaria

Amparo Taboada Gil

2025/621